

## 2 ABASESSALONIIKA

Essuula : **1** 2 3

### ESSUULA 1

**P**awulo ne Sirwano ne Timoseewo eri ekkansa ey'Abasessaloniika mu Katonda Kitaffe ne Mukama waffe Yesu Kristo;

<sup>2</sup> ekisa kibeerenga gye muli n'emirembe ebiva eri Katonda Kitaffe ne Mukama waffe Yesu Kristo.

<sup>3</sup> Kitugwanidde okwebazanga Katonda ennaku zonna ku lwammwe, ab'oluganda, nga bwe kisaana, kubanga okukkiriza kwammwe kukula nnyo, n'okwagalana kwa buli muntu ku mmwe mwenna mwekka na mwekka kweyongera;

<sup>4</sup> naffe bennyini n'okwenyumiriza ne twenyumirizanga mu mmwe mu kkanisa za Katonda olw'okugumikiriza kwammwe n'okukkiriza mu kuyigganyizibwa kwammwe kwonna n'okubonaabona kwe muzibikiriza;

<sup>5</sup> ebyo ke kabonero k'omusango gwa Katonda ogw'ensonga; mulyoke musaanyizibwe obwakabaka bwa Katonda, n'okubonaabona bwe mubonaabonera:

<sup>6</sup> oba nga kya nsonga eri Katonda okubasasula okubonaabona abababonyaabonya,

<sup>7</sup> era nammwe ababonyaabonyezebwa okubasasula okwesiima awamu naffe, mu kubikkulibwa kwa Mukama waffe Yesu okuva mu ggulu awamu ne bamalayika ab'obuyinza bwe,

<sup>8</sup> mu muliro ogwaka, ng'awalana eggwanga abatamanyi Katonda, n'abo abatagondera njiri ya Mukama waffe Yesu:

<sup>9</sup> abalibonerezebwa, kwe kuzikirira emirembe n'emirembe okuva mu maaso ga Mukama waffe ne mu kitiibwa ky'amaanyi ge,

<sup>10</sup> bw'alijja okuweebwa ekitiibwa mu batukuvu be, n'okwewuunyizibwa mu bonna abakkiriza (kubanga okutegeeza kwaffe gye muli kwakkirizibwa) ku lunaku luli.

<sup>11</sup> Kyetuva tubasabira ennaku zonna, Katonda waffe abasaanyize okuyitibwa kwammwe, era atuukirize n'amaanyi buli kye mwagala eky'obulungi na buli mulimu ogw'okukkiriza;

<sup>12</sup> erinnya lya Mukama waffe Yesu liryoke liweebwe ekitiibwa mu mmwe, era nammwe mu ye, ng'ekisa kya Katonda waffe ne Mukama waffe Yesu Kristo bwe kiri.

### ESSUULA 2

**N**aye tubeegayirira, ab'oluganda, olw'okujja kwa Mukama waffe Yesu Kristo n'olw'okukunjaana kwaffe gy'ali;

<sup>2</sup> obutasagaasagana mangu mu magezi gammwe, newakubadde okweraliikirira newakubadde olw'omwoyo, newakubadde olw'ebbaluwa efaanana ng'evudde gye tuli, nti

olunaku lwa Mukama waffe lutuuse;

<sup>3</sup> omuntu yenna tabalimbanga mu kigambo kyonna kyonna: kubanga olunaku olwo terulijja wabula ng'okwawukana kuli kumaze kubaawo, era omuntu oli ow'okwonoona nga alimala okubikkulwa, omwana w'okuzikirira,

<sup>4</sup> aziyiza era eyeegulumiza okusinga buli kintu ekiyitibwa Katonda oba ekisinzibwa, n'okutuula n'atuula mu yeekaalu ya Katonda, nga yeeraga yekka nti ye Katonda.

<sup>5</sup> Temujjukira, nga bwe nnali nga nkyali gye muli, nababuulira ebyo?

<sup>6</sup> Era ne kaakano ekirobera mukimanyi, alyoke abikkuke mu ntuuko ze.

<sup>7</sup> Kubanga ne kaakano ekyama eky'obujeemu weekiri kikola: wabula kyokka aziyiza kaakano okutuusa lw'aliggibwawo.

<sup>8</sup> Awo omujeemi oli n'alyoka abikkuka, Mukama waffe Yesu gw'alitta n'omukka ogw'omu kamwa ke, era gw'alizikiriza n'okulabisibwa kw'okujja kwe;

<sup>9</sup> naye okujja kw'oyo kuli mu kukola kwa Setaani n'amaanyi gonna n'obubonero n'eby'amagero eby'obulimba,

<sup>10</sup> n'okukyanya kwonna okutali kwa butuukirivu eri abo ababula; kubanga tebakkiriza kwagala mazima, balyoke balokoke.

<sup>11</sup> Katonda kyava abasindikira okukyanya okukola, bakkirize eby'obulimba:

<sup>12</sup> bonna balyoke basalirwe omusango abatakkiriza mazima naye abasanyukira obutali butuukirivu.

<sup>13</sup> Naye kitugwanidde ffe okwebazanga Katonda ennaku zonna ku lwammwe, ab'oluganda abaagalwa Mukama waffe, kubanga Katonda yabalondera obulokozi okuva ku lubereberye mu kutukuzibwa Omwoyo n'okukkiriza amazima

<sup>14</sup> bye yabayitira n'enjiri yaffe olw'okufuna ekitiibwa kya Mukama waffe Yesu Kristo.

<sup>15</sup> Kale nno ab'oluganda, muyimirenga, era munywezenga bye mwaweebwa ne muyigirizibwa, oba mu kigambo oba mu bbaluwa yaffe.

<sup>16</sup> Naye Mukama waffe Yesu Kristo yennyini, ne Katonda Kitaffe, eyatwagala n'atuwa okusanyusa okutaggwaawo n'essuubi eddungi mu kisa,

<sup>17</sup> abasanyuse emitima gyammwe aginywezenga mu buli kikulwa n'ekigambo ekirungi.

## ESSUULA 3

**E**bisigaddeyo, ab'oluganda, mu tusabirenga ekigambo kya Mukama waffe, kiwulukuke, kiweebwenga ekitiibwa, era nga mu mmwe;

<sup>2</sup> era tulokoke eri abantu abatalina magezi, ababi; kubanga okukkiriza si kwa bonna.

<sup>3</sup> Naye Mukama waffe mwesigwa, alibanyweza, anaabakuumanga eri omubi.

<sup>4</sup> Era twesiga Mukama waffe mu bigambo byammwe, nga mukola bye tulagira era munaabikolanga.

<sup>5</sup> Era Mukama waffe aluranyenga emitima gyammwe okutuuka mu kwagala kwa Katonda ne mu kugumiikiriza kwa Kristo.

<sup>6</sup> Era tubalagira, ab'oluganda mu linnya lya Mukama waffe Yesu Kristo, mweyawulenga eri buli ow'oluganda atatambula bulungi newakubadde mu mpisa ze baaweebwa ffe.

<sup>7</sup> Kubanga mmwe mwennyini mumanyi bwe kibagwanira okutugobereranga: kubanga tetwalemwa kutambula bulungi mu mmwe;

<sup>8</sup> so tetulyanga mmere ya muntu yenna ya bwereere, naye mu kufuba n'okukoowa twakolanga emirimu ekiro n'emisana obutazitoowerera muntu ku mmwe:

<sup>9</sup> si kubanga tetulina buyinza, naye tweweeyo gye muli ng'ekyokulabirako mulyoke

mutugobererenga.

<sup>10</sup> Kubanga era bwe twali gye muli, twabalagira bwe tutyo nti Omuntu yenna bwagaananga okukola emirimu, n'okulya talyanga.

<sup>11</sup> Kubanga tuwulira nti eriyo abamu abatatambula bulungi mu mmwe nga tebakola mirimu gyabwe n'akatono, wabula egy'abalala.

<sup>12</sup> Abali bwe batyo tubalagira era tubabuulirira mu Mukama waffe Yesu Kristo, okukolanga emirimu n'obuteefu balyoke balyenga emmere yaabwe bo.

<sup>13</sup> Naye mmwe, ab'oluganda, temukoowanga mu kukola obulungi.

<sup>14</sup> Era omuntu yenna bw'atagonderanga kigambo kyaffe mu bbaluwa eno, oyo mumwetegerezanga, so temwegattanga naye, ensonyi ziryoke zimukwate.

<sup>15</sup> So temumulowoozanga nga mulabe, naye mumubuuliriranga ng'ow'oluganda.

<sup>16</sup> Era Mukama waffe ow'emirembe yennyini abawenga emirembe ennaku zonna mu bigambo byonna. Mukama waffe abeerenga nammwe mwenna.

<sup>17</sup> Kuno kwe kulamusa kwange Pawulo n'omukono gwange, ke kabonero mu bbaluwa yonna: bwe ntyo bwe mpandiika.

<sup>18</sup> Ekisa kya Mukama waffe Yesu Kristo kibeerenga nammwe mwenna.

For other languages please go to **[www.wordproject.org](http://www.wordproject.org)**